

## GETXO'KO BASETXE ZARRENTZAKO KANTUA

Ba-dut barne-kantu bat, biotz abestia,  
antziñako soifñuaz oiu dagidana.

Ez da ederrak sortua, ez geiago-naiak;  
maitasun utsak sortu du ta geitu urrunak.

Arri zakarrak dira, milla ekaitzek yoak,  
kantu ori gogora eman didatenak.

Arri zakarrak, baike, baiña aien artean,  
gizaldirik gizaldi, mende ta mendetan,

nire aita zarrak, beti Kristo'ren fededun  
izanak dira baita bizi ta il euskaldun.

Arri zakarrak, baiña Bizitzaren berri  
belaunik belaun, ongi dutenak ikasi;

ta Eriotzak illunki, beren atek yoaz,  
santu egin dizkidanak ziranen oroiaz.

Arri zarrak zuenak, Abaroa, Aresti,  
Arrigunaga, Arnabar, Zuazo ta Sarri...

Nire yaioterriko antziñako etxeak,  
zuek emanak ditut abizen guziak.

Ainbeste urtez nauzute zuengandik urrun,  
baiña ez zaituztet aiztu ez iñoiz ez iñun.

ta iñoiz baiño geiago zuen bearrean  
nago orain onenbeste urteren buruan.

Zuek berriz ikusi, zuen atarian  
bidazti zar bat antzo, gura nuke atsedan.

Amonatxo zar baten tximurrak bezela,  
orma oien zirrituak uki ta musuka.

ta antziñaldietako milla gauza galde:  
zuengandikoa naiz, semea nauzute!

Zuek, mundu onetan zerate nire erro,  
zuengana bear dut, umezurtz bat antzo.

Iñongo yauregiek ez nau egin bere;  
urteak, erbestek bestelatu ez naute.

Zuek ikasia naiz beti bat izaten,  
mundu guzian zear euskaldun irauten.

Ene Jainko maiteak emango al dit, arren,  
ikus zaitzatedala lurra utzi baiño len!

BINGEN.

Caracas, 1963, orrilla.





## A L E G I A

Poetak alferretan,  
Añarbak erhoetan,  
Amarauna iruten  
Neurthitzak egiten.

Aizea dathorrela  
Gauaz suak piztez,

Bien lana darama  
Urta ta erratzez.

Zoazila jakitera  
Amaraunen zihoa;  
Bertan ba dakikezu  
Zertako den pertsoa.

## Z E R B I T Z A R I A

Anderea bertze gabe  
Jartzen nuzu zerbitzari  
Pertsoetan edasteko  
Zu zirela xarmagarri.

Zure lege goxoari  
Zer lekio agrada?  
Erradazut heltzeari  
Emanen dut fedea.

Anderea zerbitzuak  
Loa kentzen baderaut,

Ohoïn horren eskuagaz  
Ebatsirik goxo zaut.

Lapur eder, egun oroz  
Ez ba-zaitut ikusten,  
Zure gatik sekulakoz  
Botsa zaut ixilduren.

Anderea axol horrek  
Ez bazaitu hunkitzen,  
Zure gloriaz orhoitzean  
Ausart zaite mintzatzen.

# NERE XEDERAN

Nere xederan goiz batez  
Ainhara beltz bat sarthu zen,  
Zeinek zerasan latinez  
Hurrundik zela ethortzen.

Zeru gainetan egonik  
Izarrak lagun zerautzkan;  
Neurea gandik jautsirik  
Goraintziak zekharzkidan.

Zure Izarrak, ortzean,  
Begiak eze ihintzez,  
Idorrik dauka bihotza  
Zure gantikan nigarrez.

Basa-egiaren saritzat  
Libre doha ainhara bat.  
Joan da, Ez dut hasperenik  
Maitearen berri jakinik.

# GAUR LOREA

Gaur Lorea jin nitzaiän  
Lotaran ikustera;  
Betezpalez gorde drautan  
Hire begi distira.

Othoi pharka nere maite  
Iratzartu hindudan.  
Lo hindagon eta hire  
Gal beldurra bai'neukan.

Iratzarri ba'haidanez,  
Ez lokhartu berhala,  
Lo goxoen gainetatik  
Jautsi hakit Izarra.

Argiaren zubietik  
Goazen Gazteen Herri-ra

Hire begien argiak  
Gida gisa ba dira.

Belar-urik ez du behar  
Amoriotan jartzeko  
Neri aski zitzaizkidan  
Begi bi xoratzeko.

Begietan urhe berde  
Amodio kolore,  
Argi hori lagun ez da  
Gauik neholaz ere.

Gaur lotara jin nitzaiän  
Lorea ikustera,  
Betezpalez gorde drautan  
Hire begi distira.

D. PEILLEN.



# GOIZ GARBI

Esnaola'tar Aingeruen Mari-ri  
esker onez.

Garitza el-arinetan  
zanbulada ezez goiza.  
Azaroaren ondoren,  
ostots-aizearen poza!

Landa mardulen bakean  
beredin bizitza urduri;  
basoen eze garbiak  
otoitz ixila dirudi.

Gori iausten da lurrera  
edoi-arteko eguzki.  
Aizeak inausten dautsoz  
urre-errainuak bigunki.

Bizkor doa neskatila  
sorginderen zidor-zear,

firi-firi soinekoek,  
mailuki-zun (1), eskun otar.

Alai bizkorren egadak  
zetakarik ez daukate.  
Neskatxa orren liraina  
iru biotzen gudute.

Berak oso dau biotza,  
gogamenak baizen oso.  
Norentzat abesten ete  
orren bigun eta gozo?

Mailukiz gorri otarra;  
aizean zoli kanta bat:  
"Onentxuak erungo-taz,  
auzoko Betargi'rentzat".

AURRAITZ.

---

(1) *Mailuki-zun* = marrubi-bila.

OARTU: Irakurleak be igarri egikeanez, 1962'garren urteko azken-zenbakian (201'gn. orrialdean), bigarren ahapaldia peitu yako, oso-osorik, ERRIMINA izenaz argitara zirean moltzoko *ORO ARROTZA* nire olerkitxuari. Ona emen, ba, irar-leak ahantzita itxitako txatala:

*Banbu*-pean nago  
bazkaritan,  
lau italiar lagun  
inguruan,  
Tamalak gizonok!  
Bigun deutse,  
elea ereitsu,  
ermina autu.